

光緒山西通志

名宦錄十三

錄一之十三

山西通志第一百十三

賜進士出身頭品頂戴兵部侍郎兼都察院右副都御史巡撫山西提督軍務臣張勳奉
旨監修

庶官

明

國朝

熊鼎字伯穎臨川人元末舉於鄉鄧愈薦之留幕府洪武時
爲晉王府右傅坐累左遷大同衛知事復投晉王府參軍八
年改岐甯衛經歷朶兒只叛爲賊遇害

桂彥良名德偁以字行慈谿人元鄉貢進士洪武六年徵詣
公車後爲晉王府右傅上親爲文賜之彥良入謝上曰江南
大儒惟卿一人彥良至晉製格心圖獻王後更官制改左長
史請告歸卒

龍鐔字德剛江西萬載人洪武十三年貢爲國子生累官晉

府長史建文中靖難師起朝廷徵兵於晉鐔以大義力主發兵靖難後詔械鐔至不屈死之

周幹瀏陽人洪武間貢入太學授山西布政司照磨廉慎有為大著才名永樂中歷升浙江布政使

徐讓布政司理問材氣磊落有口辨建文時應募齎書物至北平議和解兵受而不荅還授衛鎮撫軍前差遣戰歿

張鄺汶上人永樂間解元任教諭升山西按察司經歷承檄執妖賊勦敵屢立奇功升德慶州知州母卒廬於墓側詔旌其門累官鳳陽知府

李夢陽字獻吉慶陽人宏治癸丑進士歷戶部郎中為尙書韓文屬草劾劉瑾瑾熾旨謫山西布政司經歷勒致仕後起江西提學副使歸卒謚景文

朱壽開州人爲吏科給事中以劾輔臣趙志皋張位坐謫山西按察司知事卒天啟中贈太僕寺少卿

楊松河南衛人爲御史巡皇城劾尙膳少監黃雄詐稱駕帖請三級給事御史交章救不納謫山西布政使照磨終山西副使

麻億慶陽進士爲兵科給事中以倚附東林謫山西按察知事後仕至太常卿賊陷慶陽不屈死

翟鳳翀字凌元益都進士爲御史抗疏極論中官呂貴冉登刑洪罪謫山西按察司經歷與給事中郭尙賓號二諫後爲兵部右侍郎巡撫天津卒贈兵部尙書

楊浩濟甯人由鄉舉入國學除河東鹽運判官景帝建大隆福寺嚴壯與大興隆並四年三月寺成克期臨幸浩抗疏切

諫乃止聲藉甚累官延綏巡撫卒

胡瓚餘姚人進士宏治間運司同知才識敏練時場積餘鹽官民俱苦之瓚建議奏請改派稱兩便焉中場收放鹽課多則病民少則病商瓚一歸於平後致政去

廖俊江西新淦人進士正德間以工部郎中升運司同知俊居官廉貧不能歸遂寄籍焉有河東漫興集行於世

劉勳潛江人嘉靖間任運同清而勤戴星掣放無倦色

王建中平湖人萬厯間由省中遷福建按察使謫河東運判持己清廉凡興革大務如壓待進鹽運發遠商等事胥力爭不爲勢沮

盧友竹崇禎間運司同知清潔不染攝總司篆痛革陋規禁衙役覆隱匿又增兵濬濠爲城守計臨機應變調度有法

黃里雲內州同知洪武五年秋蒙古兵突入城里率兵巷戰

力竭死之

以上
司道

謝忠上虞人洪武初任太谷縣主簿以文學政事著稱

承谷容武進人交城縣丞勸課農桑平徭薄賦升兗州府同知

陳章應晉江進士榆次縣丞調安邱藩憲考其學優廉幹以狀聞特降旌榜嘉之終禮部主事

馬謙順德人交城縣丞興學勸農政績甚著升戶部主事

黃福字如錫昌邑人由鄉貢初授項城縣簿改清源清廉仁愛民無不懷以憂去後以京衛經歷上書論國大計太祖奇之升工部右侍郎後官尚書正統初進少保卒諡忠宣

范宣歸德人永樂十三年任榆次縣訓導邃於問學章采蔚

然言動有則諸生奉爲模楷祀名宦

崔忠唐縣人嵐縣典史在任九載廉聲大播

蘭從善磁州人太原教諭博學工文造士寬嚴有方累官翰

林學士

周禮任邸人正統間祁縣丞學問該博造士綏民

滕淵祥符人嵐縣典史有廉能聲當道皆重其材嘗承檄率

民兵戍偏頭關秩滿去行李蕭然祀名宦

王恭晉州人景泰三年以舉人任榆次縣訓導性恭謹與諸

生講解日夕不倦聞者豁然祀名宦

黨忠字行恕陝西舉人任榆次縣教諭嚴重有師範勤於作

人所列科條詳明簡要在白鹿驚湖之間祀名宦

成憲字伯度新泰人天順元年以舉人任榆次縣訓導博極

羣書於易尤邃善化導經指授者悉有成就祀名宦

宋賓中部舉人任陽曲主簿詢民隱抑制豪強升陝州知州
溫敬武安人宏治五年以監生任榆次縣主簿操守甚嚴請
託竿牘咸謝絕有材幹能治煩劇祀名宦

宇文鍾乾州舉人榆次教諭學問闊博善開導諸生有疑義
批卻導窾不數語輒曉暢其以文來正者就所製爲潤色頃
刻數十篇人人悅服後舉進士累官監察御史祀名宦

李文字洛南正德間進士累官太原同知平孟礦之亂民賴
以安署平定州緩征均徭尤多惠政

許孜咸陽舉人岢嵐學正博極羣書誨人不倦嘗題楹云報
國陶鎔忠孝士窮經講究聖賢心至今傳誦

王堯卿招遠人嘉靖初以監生任太原縣教諭待士以誠士

咸服教居八年致仕去諸生泣送之祀名宦

徐元孝字子順餘姚舉人任榆次縣教諭性夷曠忽遽中言笑常自若循循善誘從遊者皆彬彬雅成名士典試四川擢平陸知縣祀名宦

張天憲高苑人太原縣丞性廉潔洩事明敏待人以誠邑賦舊多逋天憲示以期輸者雲集以呈誤去官縣人惜之祀名宦

王珠鹽山人陽曲縣丞才識明敏折獄能晰情偽善應對嘗議款塞外言辭侃侃聽者悚然尋擢大同府通判祀名宦
張天錫霸州進士由蘭州知州升太原同知愷悌宜民升陝西按察司僉事

江樊開化舉人貌樸心古詩詞敏捷爲太原府通判監修邊

城齋金振饑秋毫無染當道者稱之

張九經文縣舉人太原通判居官守正不求聲譽一生嗜古好學不問家產

潘縉字朝紳臨洮人嘉靖間以貢生任太原縣丞遇歲凶民朝夕不給而追呼者不爲止抗顏與爭出俸錢飯饑民當隆冬有赤體者買花布畀之災黎待以舉火者且數千指甫七閱月奉檄督漕賦不欲鞭朴窮民以博上官寵遂解組去太原人口祝之尋請於學使祀名宦推官高陵李仙風有記溫訓漢陰舉人隆慶三年任太原同知穎悟博學善詩文以清廉著稱升戶部員外

殷廷舉星子舉人太原同知承檄均丈定襄地糧悉心區畫不憚勞瘁所至輒進士民誨以孝弟力田之義一時相聚如

家人父子定襄人有遐思焉

薛懷奇新鄭人司訓交城性醇雅不縈情勢利與人接歡然終日諸生相慶如在光風霽月尋爲權相中傷去祀名宦趙禧益都人文水縣丞時值寇警日集鄉兵聯什伍登陣固守寇去民有遭殘毒者徧行弔問死者掩埋之

李選白河人萬曆八年以選貢任陽曲縣丞雅度清操聽訟多所平反時大令屈灼以嚴肅勝選以寬大佐之民愛戴如父母擢知縣去祀名宦

王嗣美朝邑進士爲太原推官持己廉約接人平恕每聽斷以明允稱擢戶科給事中

陳良謨吳江舉人文水教諭治經有法聯社課藝從學者雲集中丞魏學憲杜檄詣會城書院訓多士甲午秋就聘分校

閩中稱得人後升涪州知州

談應春安化舉人興縣教諭率先化導士風丕變升任嵐縣吏民畏威逋賦爭輸每朔望進弟子而誨文藝孜孜忘倦

趙希壯崇禎間任文水典史慷慨負氣適流寇入縣境親督鄉兵往偵猝與賊遇遽前搏戰沒於陣

以上太原府

周凱棗強人洪武初平陽府通判多政績

蕭韶龍泉人任臨汾縣丞有能聲詳見彰善錄中祀名宦

薛大昉蠡縣進士翼城縣丞清慎愛民雅重學校歷任十年聲名洋溢遠近擢御史累官布政使祀名宦

徐彪商河人臨汾縣丞以治行最擢平陽同知盜息民安威望益著祀名宦

袁景甘泉人太平主簿清操自守嘗冬日衣單衣理事有吏

夜持緼袍奉之不受次日對眾發其事按以法聞者聳然泣
任七年擢監察御史祀名宦

王暉狄道人永樂間鄉甯主簿廉潔慈祥撫字有方民懷其
德歷久頌之

辛繼先襄城人吉州學正一介不取忠厚正直人稱爲義皇
以上人祀名宦

賀琳宜君人洪熙時浮山縣丞贊政不苟嘗捐俸備禮勸富
民助償逋稅自是流移復業及憂去民饋賸不受泣送者至
數百人

丁璉鄆陵人宣德五年以舉人司訓襄陵學博行高見文廟
頽廢慨然修葺訓諸生先行後文擢翼城知縣祀名宦

楊志學河內人正統九年以舉人任襄陵縣教諭少從薛文

清遊講明心性操履清慎訓誨勤篤涖職八年卒于官貧不能斂厝城外僧舍文清過而哭焉後子御史徽始扶柩歸葬張元陝西人天順四年以舉人任襄陵縣教諭工詩爲生徒講解隆冬盛暑不輟沐其教者皆興起科第甲一時擢國子監博士祀名宦

吳佐西安人成化間曲沃教諭以憂去補稷山教諭著大學經傳元編人多傳之

趙元涇陽人宏治間翼城教諭學問老成教規嚴整生徒貧者周給之

何鳴謙高苑舉人曲沃教諭講學課藝無虛日嘗與諸生同宿學舍督讀甚力貧不能自給者捐俸資之涖任二年卒諸生哭甚哀祀名宦

張衍瑞字元承汲縣人正德中爲吏部郎中諫南幸受杖下獄謫平陽府同知嘉靖中召還卒贈太僕卿

張琴雞澤人以歲貢任翼城縣丞剛正自守秩俸外一無所取又寡諧不輕與人接公事後閉戶吟嘯清介絕俗以艱去嘉靖初補聞喜後擢太原府經歷祀名宦

任繼宗蒲臺人岳陽教諭端重有令望勤于訓誨寒暑不少閒諸生翕然尊之祀名宦

劉衍祚洛陽人嘉靖間以進士任平陽府同知時南北用兵其冬地大震城市爲墟不逞者聚眾爲亂而郡守及各屬令俱入覲衍祚代篆闕誠布公明法飭令緩刑薄稅築城修廩鎮守封疆復開樊家河爲永利渠築石堰障水溉田數十頃郡人建祠祀之

包鍾乾州人吉州判官事母以孝愛民以仁創築外城不私派一錢

丁由義泗水人襄陵縣丞廉介甘澹泊撫恤小民備至嘗署曲沃篆卒于官棺衾無所出知縣宋之韓賻之祀名宦

王榮詰華州人萬曆十七年以舉人在臨汾縣教諭博學工文教士能遵蘇湖遺法祀名宦

周鼎宜興進士任平陽推官有清操州縣吏無敢以苞苴進者嘗督府篆所有羨銀俱貯庫上報公事後布被紙帳突燬然無煙後遷兵部主事累官總理河道工部尙書

萬一本全椒人以選貢任平陽府通判明敏具幹濟材屢署州縣所至皆有能聲後解組去凡前所涖地士民胥遮道送之祀名宦

常克念洛陽人舉進士爲平陽府推官有聲崇禎十四年正月洛陽陷抗節死

劉士璉遼東進士崇禎間平陽府推官慈祥豈弟多所平反項易禹州人曲沃教諭方嚴言動不苟諸生咸服其教後擢沙河縣知縣以殉難著

以上平陽府

邵童西和人洪武八年以舉人任蒲州同知恭謹守法上官累旌異之祀名宦

季錫字天祿咸甯人舉永樂戊子鄉試第一授蒲州學正毅然以師道自居教人立身制行皆以身先之出其門者多成令器升給事中

何福全鳳翔人宣德間以吏員任萬泉縣丞充勸農官省耕耘察紡績雖風雨不倦廉潔自矢有二婦夜織一偶出其一

問曰晴乎曰晴如何爺蓋名動婦孺如此累官參政祀名宦
盧祥字仲和東莞人正統間進士官吏科給事中以言事謫
蒲州州判幼多技能年三十後始習舉業官諫垣疏糾大臣
王文項文曜姦惡及爲州佐慷慨就任勤其職不懈曰吾素
位而行也天順初召爲禮科都給事中累官延綏巡撫
潞林新野人宏治初蒲州同知幹理公勤剖決精審卒於官
民哭奠久而不忘

王懋咸甯人嘉靖六年以御史謫萬泉典史立朝有大節降
今官能以慈惠著尤好崇獎士類政暇輒授經諸生嘗以民
艱於水鑿池畜之在今崇德街號曰惠民擢長垣知縣累官
懷慶知府

黃光煒羅山人崇禎二年以舉人任猗氏縣教諭立期課藝

輒具酒食勞之賢才奮起科第甲一時擢知吉州甲申闖寇過河陷州城將立僞官州民願得光煒光煒微服遠遁莫知所終

以上諸州府

張三同字大亨阜城人洪武初以進士任潞州同知以勤恪著創州治修廟學在城二十四坊皆所定也尤加意學校兵戈之餘粒誦不輟祀名宦

嚴杞臨川人黎城主簿治煩以簡愛民以誠升武功知縣張思中樂清人潞州同知廉幹勤敏升工部都水司郎中任昂河陰人元進士博覽羣書早有才譽拜晉甯尹不受洪武初以儒士爲襄垣訓導後爲禮部尙書禮制多所裁定予告歸

郭柏闔縣進士壺關縣丞存心仁恕嘗鑿惠澤池于南關迄

今賴之

郝景隆蓬萊人宣德間以舉人爲長子簿會學官領垣捐俸修葺歲旱禱雨雨輒應旣去民思之

阮河交趾人長子典史永樂初交趾入職方河率先歸附以功授雲屯縣典史及犁氏亂抱印航海以其家來歸改官長子勤于其職卒遂占籍焉子勤以進士官刑部侍郎贈河通議大夫祀名宦

喬育宣德時爲襄垣主簿部民言其賢特命超遷勸之

張維祥符人正統初壺關教諭教有成績升浙江道監察御史

王鏞廬陵人天順間以舉人任潞州學正學博行高勤于訓迪經指授者各有成就諸生皆以義盡仁治稱之後升國子

監學正

曹蘭蘭州人宏治間壺關教諭學問該博尤善啟迪後登進士歷巡撫都御史

王致中洛陽人正德間潞州學正教人有方講學不倦

胡侍甯夏人舉進士歷官鴻臚少卿張璫桂萼擢學士侍劾二人越禮背經反覆辨論千餘言命逮治言官論救謫潞州同知剛介不阿持大體抗言時事藩府宗室勛注以事憾之奏待試諸生題譏刺且謗大禮逮至京訊斥爲民卒

葛大紀商州進士同知潞安厚重持大體不假威嚴人自起敬歷官本省參政

崔鋪綬德進士任潞安推官和易可親而中有定見官至本省巡撫

倪政甘肅人以貢生同知潞州政家世將門謀而有勇平青
羊之變與有力焉

王禮完縣人壺關縣丞有執持能自愛數折疑獄民程虎山
者嘗殺人藏其尸以無左驗不坐罪禮奉委往檢忽風起馬
前禮曰此冤氣也隨風迹之輒得虎山論如法

靖四方淇縣人隆慶間以舉人同知潞安練達精明諸事就
矩厯官僉事

喬木上海進士萬厯間同知潞安嚴能馭眾明足服人尤重
文學士凡所甄拔後皆知名升河南僉事

耿鳴世新城人以進士官御史左遷潞安推官性耿介見有
不可卽正色糾列上官咸虛懷受之升主事

靳賢靜甯舉人通判潞安有治民才厯署州縣編審聽訟人

人稱平催科得法民間輸納恐後政聲大著委署無虛日皆稱任使升尚嵐州不就

況增光蓋屋人任潞城教諭問學宏深操履慎重升浮山縣新聖居字淑孔長垣人崇禎元年進士由照磨擢路安推官再被謫後遷慶揚府推官十六年十月殉城

以上縣安府

許孟和鄞縣人洪武間石州學正時天下初定學校廢弛孟和修建廟學齋舍朝夕率諸生講質經史在所造就者入宦皆有實效

葉伯巨字居升甯海人以國子生授平遙訓導洪武九年以災異求直言巨伯上書言當今之事矯枉太過者三日分封太多日用刑太繁曰求治太速書上上大怒曰小子聞吾骨肉速逮來吾手射之既至丞相乘上喜乃敢奏命繫刑部獄

瘦死獄中先是伯巨將上書語其友曰今天下惟三事可慮耳二事易見而患遲一事難見而患速其意蓋謂分封也迨洪武末年燕王奉命屢出塞後遂興靖難之師人以伯巨爲先見云

衛健孝義縣丞讀書習吏事好談古今忠孝節義靖難師起慷慨臨戎率所部禦之以身殉祀名宦

宋秉彝字孝先淮安人任石樓縣主簿有長材佐令顧碩修學宮庀材鳩工最力值歲凶振濟有法民多全活後擢馬邑縣丞

高俊膚施舉人成化中任汾州同知剛方自任州北有峽路阻澗多伏盜俊伐石塞澗行旅賴以無患

李詔開州人正德間孝義教諭立身清慎教條嚴明諸生有

不修其行者輒斥責之士習頗改

陶璽威海衛人嘉靖間以太學生任石州州判有清操恥與俗伍常思以功名見歲饑賊起據劉王掌爲巢穴犯黃櫨嶺逼吳城璽督部下閭大剛王天祐等徑往遏之賊聞退保壘上壘追至黑暗嶺遇伏兵大潰璽負高出戰甚力與大剛天祐俱死子化甫年十五具疏闕下復念父暴骨異地母與弟俱無依亟返至壽陽卒於旅邸後朝廷憫其忠贈石州知州蔭子傳入監除詹事府錄事

李完陝西涇陽人甯鄉典史性廉潔不以末僚自菲薄自始至終厲清苦如一日善折疑獄時人以青天呼之

陳翔鷺閩縣舉人萬厯間介休教諭學博行潔每以甘貧嗜學訓諸生修育材館羣其中而督課之多所成就升徽州府

判以上粉州府

陳德鳳陽人洪武間沁水丞明初修治城垣公廨廟學壇壝鋪舍其功甚多

方涓正定人陽城主簿佐縣令李芾以治聞宋文恪學記盛稱之

鄭可權睢州人澤州學正文行俱優兩主山西鄉試

李希文甯州人永樂間高平丞以廉勤著嘗祛虎害民德之升福建市治提舉副使

張璵揚州人正統間以舉人任沁水教諭通五經尤邃於詩嚴於誨人以愛去服闋補鎮平縣沁諸生上疏爭之

劉一清陳州人成化間陽城教諭禔修正教勸業惜時能以矩矱約束諸生居九載講授不倦士論歸之升黎城知縣

蔡深宏治間陽城訓導勤於教人樂育不倦以載記授學者迄今相傳不泯

孫應奎字文宿洛陽人正德十六年進士嘉靖中戶科左給事中十一年同官王準以劾張璉桂萼謫典史應奎具疏爲準辨遂乃並謫高平縣丞恤民造士邑多異戴後仕至戶部尙書致仕卒

李菘內鄉人以檢討謫陽城丞日事翰墨政事不廢升大名推官

王標壽州人陽城典史蒞任未幾剿賊遇害百姓惜之祀名宦

孫文澤鄒平人陽城主簿小心謹慎嘗考邑戎鹽諸務廉得弊端力爲釐正編審賦役民無貧富悉稱平遇旱禱雨如注

宗思涇陽人萬厯間以貢授澤州學正鹽使者謁廟以兩將拜於堂上思抗聲曰拜下禮也御史肅然復其位又捐俸修學宮月課諸生親自甲乙不少爽後遷肅府教授以上澤州府王達善無錫人洪武間任大同府訓導學問淵博氣度和雅馭諸生恩義兼至稱經人兩師嘗著天游小棗梅花百詠後累官翰林學士

李福眞甯人由監生任大同同知英宗北狩時福冒險進貢久無怠志回鑾日升本府知府進參政仍管府事

于璧新城人成化間以舉人任渾源州學正學富才優教嚴品肅集諸生朝夕教迪人才極一時之盛徵拜御史

馬隆中部人正德間任大同府推官性沈毅執法如山然廉平不苟無滯獄後戍卒變將鼓譟入王府隆挺身往亂卒聞

隆至皆寂然退就伍無敢譁者

屠安民興安人嘉靖間以舉人任大同同知以寬和甦罷困循良著聲升恩州府知府

惠之翰清澗舉人大同通判時雁門糧餉奸人侵漁翰廉而寘之法飲冰茹蘗遇事能身任不辭勞怨嘗語人曰苟利於民此官可棄何恤乎人言

馬應圖平湖人萬歷五年進士爲南京禮部郎中上疏譏切執政忤旨謫大同典史後爲禮部員外郎卒

范錫定興舉人大同東路同知慈祥廉幹動爲邊民造福規百年之計創建廣積倉甄包南關皆其營度歲歉多方贍救民賴以活至於加意學校而計室家給資斧卽家人父子不啻焉其子孫累登甲第人謂廉吏之報

王宗文龍游人崇禎間以貢任大同縣丞清勤樂易禮士愛
民運粟米以濟餉買硝磺以急公一時號爲眞父母

張朝綱廣通人由貢生授渾源州同知解職歸後寇孫可望
等兵至死之以上大剛府

張文煥洪武間任白羊鎮巡檢忠勇有清操敵騎逼邊文煥
率弓兵二百人奮勇徑進中流矢歿妻聞之亦自縊以殉遺
子一貧不能自活召至京師以父俸給之

陳董德字懋修歸善人嘉靖四十四年進士萬曆初爲兵科
給事中成國公朱希忠卒贈定襄王力爭之忤張居正出爲
饒州知府操江都御史王篆承居正旨誣劾之謫馬邑典史
復除名後終湖廣僉事以上朔平府

楊和固安人成化間遼州學正厚重博學教誨謹嚴士子畏

威懷德稱儒林第一

于璧字良玉新城進士由知縣擢御史立朝不避權要宏治二年左遷遼州州判越一年士民詣京祈知本州百廢俱舉於學校尤加意數百年來科第蟬聯皆培植力也升苑馬寺卿

陳賢順天人遼州訓導教士有方士多從之祀名宦

党傑固城舉人榆社教諭以成就後學爲心講易課文情同父子升知縣行取御史士子思之不忘

李朝綱隆慶間以貢任和順教諭純篤不浮誇人唯本忠孝祀名宦

季文察遼州同知進所著樂書四種部覆多前人所未發得合依永和聲之旨詔授太常寺典簿

冀孟曾上蔡人萬厯間以吏員授榆社縣丞潔己愛民捐逋賦減額糧課紡織勤樹藝凡有便於民無不畢舉升階州同知民擁留不忍舍建祠祀之

曾淑尼江南人崇禎間遼州吏目流寇破州城殉難

胡景化南鄭人榆社典史時流寇肆毒景化守禦不懈邑賴

以全民立石建祠

以上遼州

王崇慶開州人正德間以進士官主事上疏忤旨謫沁州州判高才遂學名山勝蹟所在嘯詠尋入爲部曹擢分巡冀南道累官南京吏部尙書

路永聰漢陰人由解州判官升沁州同知有文名居官以循良著稱

齊聞道鄜州人由舉人任武鄉教諭布衣疏食貧苦自勵振

作人文科名蔚起升黎城知縣岢嵐知州以清節著聞

曾暹吉水舉人沁州學正明經博史以善誨聞升國子監助

教

以上沁州

趙梓涇陽人洪武初任孟縣縣丞招集流移修舉廢墜孟漸以治祀名宦

朱貴永樂間孟縣縣丞性廉敏剛腸嫉惡有犯者必痛治之豪猾屏迹良善獲安

謝揆咸甯舉人孟縣教諭勤於訓迪每夜巡諸生讀書處察其勤惰而賞罰之

夏廷器餘姚人正統間平定州學正築石樓書院督諸生肄業其中平定自金元以來雅號文學地得廷器指授益知向往人材鶴起比去諸生立祠祀之

呂循矩寶坻人安治間以舉人在孟縣教諭端重有師範科條嚴謹蒞任九年多所成就

劉華江西人正德間平定州州判有至性事親孝雅善草書得懷素筆意居官清慎祀名宦

吳達安定人嘉靖間壽陽主簿改建明倫堂立射圃亭更新大成殿及兩廡創名宦鄉賢祠學校之制至是始備

吳冕臨川人嘉靖間平定州同操守嚴潔敷政慈祥升都司斷事

徐廷蕭縣人壽陽縣丞廉敏有治才時值邊警增城垣建樓櫓邑賴以保障焉

宋燾泰安進士萬厯中授御史任氣好搏擊以疏救姜士昌語刺時相上怒謫平定州判官旋請假卒天啟初贈光祿寺

少卿

于明善臨清人孟縣主簿性通敏勤於官職嘗丈地均糧一秉公正數世食其利

趙原贊皇人以舉人任孟縣教諭持身清苦勤於教誨秩滿諸生上疏留之歷三十年致仕歸

以上平定州

譚章齊安人洪武初靜樂縣丞建置縣署多善政任滿還京民爲立碑

李郁仁宗時爲定襄主簿言縣有故渠溉田六百餘頃宜亟浚治後遷孟縣令郁稟性寬宏循循雅飭不事鞭朴百廢具興

李東萊山東人嘉靖間靜樂主簿盡力城垣以廉敏稱升經厯邑人頌美不忘

劉綬洛川人隆慶間以貢生任靜樂縣丞明敏善聽斷擢知縣事適攢併都戶調停有法民不擾流亡悉歸又以城垣卑

薄增修令高厚足禦侮遷遂州知州

忻州以上

成璉直隸興化人洪武間任代州學正博學高才能以教化諸生爲務不以時當鑿造苟且尋薦知蔚州累官北平右參政贈吏部侍郎祀名宦

李昇盩厔人五臺典史有吏才雅意愛民值邑霜殺禾卽以狀聞求賑大吏委官勘稱不實置昇於獄昇略無怨望曰爲民得罪雖死何憾者庶爭訴其誣得復職

曹鼎甯晉人宣德二年以舉人授代州學正有文名課諸生頃刻十餘草立就尋以年沖乞煩劇自劾改太和典史後舉進士第一人授翰林院修撰累官內閣大學士死土木之難

贈太傅謚文忠

郝榮武剛人宏治間任代州州判仁慈而敏督理稅事寬嚴得中有劉玉者家甚貧逋稅甚多因鬻妻償之榮得其實捐俸贖還祀名宦

周宏禴麻城人以戶部主事謫代州州判忠讜敢言風采震朝宁及涖代佐州守興除利害加意學校集一時俊士課之讀授以文法嘗隨直指巡部多所平反纂修州志祀名宦

閻莊蘭州人醇縣丞撫民公恕持己清勤尤注意於學校上下悅服醇民懷之以上代州

郝九齡高陵人嘉靖間河曲典史勤介自勵嘗修築邊牆時散帑十萬錙銖不少苟歷任八年以防秋有功朝廷賜金褒

異之

保德州

傅衡臨淄人洪武間平陸典史蒞事明敏贊治公勤以績最
升監察御史

白威新野人建文間以舉人任安邑教諭積學通古今凡利
害有關於民者皆抗疏言之得允行永樂七年擢知本縣尋
入爲御史祀名宦

盧立魁高安人永樂三年以儒士任平陸縣教諭有師範勤
訓督得蘇勸遺法祀名宦

李濟三原人成化間芮城主簿歷本縣縣丞遷知縣在芮十
九年悉民閼疾苦因民爲治藹然如家人父子祀名宦

呂柎字仲木高陵人正德三年進士第一授修撰嘉靖時大
禮議興與張桂忤下詔獄謫解州判官攝行州事恤災獨減
丁役勸農桑興水利築隄護鹽池行呂氏鄉約及文公家禮

求于夏後建司馬溫公祠四方學者日至御史爲闢解梁書院以居之居三年以薦升南京宗人府經歷累晉南京禮部右侍郎致仕卒解梁士聞之皆設位行心喪柩受業渭南薛敬之接河津薛瑄之傳學者稱涇野先生

張世威渭南人夏縣縣丞循循雅量有儒者風精律學事多平反升岢嵐衛經歷邑人立石思之

邢宗道涇陽人夏縣縣丞持身廉催科不擾邑人立石頌之寇恕字道用中部人性簡靜深易學任平陸鄉南開喜三縣教諭立條約敦本實升綿竹知縣

林軒樂清舉人永樂十六年任稷山縣教諭學深養遠日引諸生與講忠孝大節師範丕著祀名宦

張居彥上虞舉人絳縣訓導學優行修被其教者皆卓然能

自樹立累官福建僉事祀名宦

張詢字信卿延安人持身清介篤信好學動以古人爲法授徒幾百人成化間官聞喜丞嘗爲縣輸餉延綬總兵詢鄉人也爲留羨餘金以遺之詢還貯之縣庫上其事于府後致仕歸貧不能自存詢處之泰然以壽終

張瑤華陰人成化間絳縣訓導敬以持已勤以課士升國子監助教

張憲涇陽人性至孝朝廷旌之宏治間絳州學正持已清慎誨人勤篤嘗捐俸造祭器有碑存焉

鄧中和膠州人垣曲教諭學行殊常教化丕振後先莫能出其右

王誥靈壽人正德八年以貢生任河津縣教諭篤學恥言利

日進諸生課誦讀尤以修行爲本模範秩然祀名宦

王松年陝西甯夏人以監生任稷山縣丞慷慨負經濟材泣官以廉幹著後回賊犯境督民兵禦之遂被害

張廷相杞縣人嘉靖四年任垣曲縣丞清苦自勵重修廟學壇壝值蝗旱多方拯救復詣京疏請發帑金六千兩穀千石民賴以活後見嫉上官被逮久之事白丁艱去百姓擁道號泣爲立碑肖像祀之

溫季春涇州人稷山縣丞嘗奉委催科能令民競相勸輸在任九年清慎如一日祀名宦

金翽樂清人以刑部郎中謫絳州同知有清操愛民如子念絳牛頭遠赴瑞石驛爲累滋甚力請折銀解納後攝州事興利除害節省歲數千金擢徽州通判祀名宦

蕭儼涇縣人嘉靖四十三年以兵馬使謫絳州同知博學工文議論悉本經史舊例汾水架橋板椿之徵歲以百計儼署篆以舊板收貯候用壞者易之不復徵銀後遂奉爲成法署臨汾臨晉諸縣俱有聲祀名宦

李棠清苑人以員外郎謫稷山典史政尙嚴明志甘清苦均里甲減徭役有德於民

馬文朝邑舉人隆慶初聞喜教諭老成忠厚廉靖安詳遇寵辱而喜怒不形重道義而束修不校卒於官士人咸憫惜之放得義竹溪人萬曆四年以歲貢任絳州同知和而能介州人多以產搆訟收委得義聽之惟理是直一無所徇擢南安通判祀名宦

劉庚壽光人絳州同知以文涉時政由南都主事左遷一時

名震中外時州牧復而奢聞庚至乃稍自戢未幾以艱去後累官浙江按察使祀名宦

陳大烈丹徒人稷山縣丞明敏清慎嘗奉檄催徵悉却常例弗進後署縣篆以安靜爲治祀棠陰祠

陳堯賓遵化人稷山主簿幹局絕敏丈田多所學畫大荒盜無巨細悉籍其名有犯無不立獲羣盜股慄避跡境中以安升齊河縣丞

秦宗文武陽人崇禎五年任垣曲典史有膽略流寇入犯宗文督鄉勇隨官兵進勦與賊遇奮臂力戰所向披靡遂沒于

陣事聞祀忠烈祠

以上
絳州

劉統長安人宏治間蒲縣丞勤政勵操執法維嚴升御史

史掌文良鄉人崇禎間任大甯典史時盜賊蜂起掌文至適

築濟城池因督其事鼓舞有方民咸樂於趨事復時走山谷親爲緝捕盜靖民安王申流寇集城下攻甚亟掌文分地守力屈死之

左中道大甯教諭端嚴有師範三日流寇破城或以無守土責勸之去中道斥之卒殉難以上隰州

凌文質洪武初趙城縣丞有幹濟材縣署學校委令督建措置有方事集而民不病祀名宦

賈昭濟陽舉人靈石教諭學行卓越歷官至雲南布政使

曹端字正夫灑池人永樂六年舉人爲霍州學正修明聖學諸生服從其教郡人皆化之恥爭訟監司大吏必遠謁知府郭晟問爲政端曰其公廉乎公則民不敢慢廉則事不敢欺晟拜受教艱歸灑池霍州諸生多就墓次受學服闋改蒲州

學正霍蒲兩州各上章爭之霍奏先得請先後在霍十六載
宣德九年卒官年五十九諸生服心喪三年霍人罷市巷哭
童子皆流涕貧不能歸遂留葬霍二子瑜琛廬墓相繼卒葬
墓側後乃改葬澠池端爲明理學之冠學者稱月川先生
張傑鳳翔人正統間以舉人任趙城訓導學閎博於五經尤
邃洩官以禮義廉恥爲教祀名宦

黃直直隸人正德間以翰林院編修謫趙城縣教諭文章品
望卓絕一時日進諸生與講論經史不以官微稍懈祀名宦
張永清萊蕪人嘉靖中靈石縣丞性方嚴洩政清慎尋卒于
官祀名宦

強自省鳳翔舉人趙城教諭建鄉賢名宦祠修講堂號舍造
祭器性剛直課士勤敏後署汾西升芮城縣胥有惠政

侯鼎祿良鄉人崇禎間霍州州判質直有勇略嘗署本州篆適闖賊兵過霍當孔道賊并力攻之鼎祿督士民登陴固守城破被執不屈死

以上霍州

右明二百一十一人

國朝

周邦翰順治間任布政司都事姜逆之亂賊徧西山交城缺令人胥憚往邦翰獨請行招集流亡斬撫定驚氓適賊有內應邦翰拔佩刀擊亂者刀未出室爲左右所殺

贈都司經歷祀忠烈祠

楊其籍按察司照磨署太谷縣事有政聲姜逆之亂賊縛其籍逼降不屈繫獄死

贈布政司知事祀忠烈祠

李因之長山人河東鹽運司副使清正率屬不名一錢姜逆之亂殉難運城

贈布政司參議祀忠烈祠

王存鏊邱縣人以選貢任河東鹽運司知事姜逆之亂與運使李運同鄭誓死殉城不爲賊辱時稱三烈

贈布政司照磨祀忠烈祠

鄭宏圖遼東人鹽運司運同甫蒞任值姜逆之亂登陴力守城破死之

贈布政司參政祀忠烈祠

以上祠道

鄭運昌江南人交城典史有能聲姜逆之亂與署縣周議分城以守內應起遂與周同日遇害

贈山陽縣主簿祀忠烈祠

王自亮太谷典史克舉其官美逆之亂協守縣城城陷繫獄以死

贈濟源縣主簿祀忠烈祠

賈道醇蒲州人太谷縣教諭偕署縣楊守城及陷賊執繫獄後先殉節

贈國子監助教祀忠烈祠

傅鸞祥字鳴和汝陽人善行草工詩賦順治十年任太原同知愛民敬士循聲卓卓後升去

劉果諸城人康熙三年以進士任太原府推官首捐俸修文廟立義學以課山谷秀民太原榆次諸縣引汾水溉田民滋爭訟果勤勘驗詳教條遠近先後胥有次第爭乃息大盜傅青山李黃毛等盤踞交城壺盧峪出沒無常授計趙令吉士

曰當以勦爲撫亦卽以撫爲勦未幾羣盜後先授首富人某
訟產先餽黃金五百假黃鼠以進峻却之當時謠曰死黃鼠
瞞不過活青天後弟榮亦以進士知平陽府有治績

李方秦曲沃舉人陽曲教諭學問淵博品行端方嚴於自修
勤於課士甲寅奉督學檄纂修通志越九年而始峻推升府
學教授陽曲舊志亦所編輯也

徐師曾新建人交城巡檢頗勤民事嘗修永固石橋佐理政
治至今故交民猶稱頌弗衰

柏永瑞內務府正黃旗人乾隆末陽曲典史才具明敏勤于
庶務不以職微而弛事歷十五年如一日

程炳章字藻如順天人同治中文水典史性篤孝友治家嚴
肅在官以督捕爲己責盜案無鉅細靡不緝獲四境以安暇

輒延文學之士訪地方利弊凡職分所能爲者罔不竭力光
緒初歿於官貧不能治喪縣人資助之以上太原府
張增寅桐城人順治十三年同知平陽府才氣不羣軍政肅
清時推爲佐郡之傑出者

徐之燧浙江山陰人洪洞縣丞器宇春溫處事犀利勤慎有
守甚爲時稱

呂和鍾長治舉人襄陵教諭持躬淡泊造士慤勤一時科名
稱盛焉和鍾旋成進士官至陝西提學僉事

王鎮寰平順人洪洞教諭嗜古力學朝夕不輟訓士得體修
學有功

王友虞會稽人翼城縣丞平定寇亂守城有功

王明輔順天人翼城典史職守勤敏捍禦多功其姪國甯有

武勇隨邑令弟何斯盛力戰卻賊陣亡從祠何廟

陳珽字壺嵐高平舉人翼城教諭學有淵源士林藉爲楷模
升國子監學正

萬錦雯宜興進士康熙間洪洞縣丞卓有政聲著名藝苑升
廣宗知縣

范韓長子舉人臨汾教諭教思諄摯被其澤者多成名士
高尚志大同人襄陵訓導民以事騰沸幾至釀變申大義息
之大成殿兩廡皆其督修仕至茶陵州知州

閻士驥陽曲舉人嘉慶中太平訓導師範克端訓誨周詳從
遊者眾庠舍幾不能容嘗刻文中子中說及格言錄

張震沁源舉人洪洞訓導經術湛深尤工帖括性嚴正每課
士砥礪名行黜竄文字面斥其瑕不少恕士風爲之一變

祁朝驤壽陽舉人道光十一年襄陵訓導學問贈博品行端
方書法尤佳一時執經問字者踵相接也

顏瑩粗山東人平陽府通判咸豐癸丑協知府何籌守禦事
甚備賊至力守北門誓以身殉城陷死之一時同死者有同
知郭陞阿經歷王殿魁府學訓導王萬昌臨汾典史吳宣並
贈卹如例祀忠烈祠

洪忠連歙縣人曲沃典史勤慎盡職粵匪之亂佐丁令率眾
守城城破遇害

贈主簿世襲雲騎尉從祀忠烈祠

盧葆元滁州人曲沃侯馬驛巡檢同治丁卯捻匪之亂賊入
衙署大罵不屈遂被害

贈卹給雲騎尉世職從祀忠烈祠

魏懸書武鄉舉人曲沃教諭自謂振興文教非異人任集合
學士子於考院月爲一課癸丑之亂肅衣冠端坐明倫堂罵
賊死子介生姪浩生亦同殉

贈國子監助教子雲騎尉世襲從祀忠烈祠

胡彭齡祁縣人曲沃訓導癸丑死粵匪之難家人俱殉

贈國子監助教銜子雲騎尉世襲從祀忠烈祠

席元燦大興人襄陵典史咸豐三年賊陷平陽土匪乘間烽

起元燦殺其首倡者一境肅然

以上平陽府

吳來亨字康侯定邊舉人順治六年蒲州學正姜逆之叛三
晉震動蒲境時有竊發事平奸人藉以織羅善類來亨力請
於當事全活甚眾平居與諸生切劘爲文章助以道義多所

石博陽城人康熙中以歲貢任臨晉訓導為人謹厚有行誼
盛爲同時士夫所推贊撰司訓署記雙烈并序文詞古宕用
意深遠

董筆平定州拔貢滎河訓導嘗捐俸修廟廡治祭器爲人偶
儻有直氣耽情風雅淡然聲利之外升蒲城縣丞五子俱以
科名顯

王德滋上元人雍正中臨晉典史有篤民心遇事當訊鞠者
齒斷斷天理良心不置去之日縣人涕洟餞之

宋培仁貴陽人乾隆中臨晉典史潔己能事百姓懷感戊辰
歲饑獻狀上官慷慨總縣有悲天憫人之意

陳世昌字藝孫湖南人舉鄉試第一道光元年授蒲州同知
初抵永樂觀風問俗卽以教養爲己任捐建蒲陽書院延師

主講除暴安良強悍斂迹士民均稱之

馬志沅字芷江代州人署永濟教諭重鑄文廟祭器修理遊
豆咸如其制又嘗司訓虞鄉修復廟學并造禮器今兩邑春

秋釋奠彬彬盛焉

以上蒲州府

司九韶內黃人順治六年以拔貢生任潞安府推官克舉其
職姜逆之亂與知府楊同日被害

贈按察司僉事祀忠烈祠

王奕葉五臺人以貢生任襄垣縣訓導姜逆之亂沈賊陷潞
安抗節而死

蘇汝霖字雲生金谿進士潞安府推官時廢藩宗民交易之
產一概入爲官佃百姓苦之屢經籲請委汝霖查勘悉爲別
白上聞民得復業爲立碑記其事云

沈源濬大同人長治訓導性淡泊冰兢自矢課士有方諸生貧者恆周給之公餘焚香彈琴了無俗累學宮傾圮捐俸倡先殫力經營規模改觀

荆益社猗氏舉人襄垣教諭誠拔寒士訓誨有方升靈壁知縣

母儀陽高人襄垣教諭重修廟學善教不息升長樂知縣張元樞交城舉人襄垣教諭初任河津時聘充丙子陝西同考以得人稱及蒞襄垣值學就圯倡捐修復工甫竣而卒多士慟之爲公請於上臺經紀其喪云

劉宏讓宛平人康熙中襄垣典史勤慎有才奉文咨訪利弊多所條陳臺司獎之其言民間典田應書合同二紙各執其一當時下其法於府州令通行云

余應階保定人黎城縣丞生禽大盜東陽關之途以清調長
治丞升中牟知縣

陳宏勳富平人平順典史飲冰茹蘗恪守官箴一時推其廉
謹

劉銘歷城人虹梯關巡檢明季流寇兵火關基盡廢虎狼出
沒居民穴處一一家銘冒險防禦清苦自勵屏私販緝奸宄
地方賴以靜謐

馬祚安邑人雍正中屯留訓導學博教嚴手著孝經解訓諸
生

李之疇滄州進士乾隆四年冬任潞安同知能文工書佐李
太守闢起文書院多士景從歷署平陽鳳臺武鄉遼州事士
之經其品題者多擢巍科郡中名勝留題最多云

馬宏燧漢軍鑲藍旗人廐亭驛丞爲人端正通曉時務迎母在署竭力奉養母卒哀毀幾至滅性人並欽其孝行云

李光萬字文在平定人由副貢任長子教諭時新闢書院邑人卽延之主講督課甚勤後舉壬午鄉試旋成進士授廣東陸豐知縣諸生立碑講院以志去思

呂天培解州舉人壺關訓導淡泊自守於貧士體恤甚至其訓人懇懇無異父兄遠近學者宗之一時橫經之士徧齋舍至不能容有文稿行世

程廷楷嘉慶十五年任壺關典史溫雅謙光自奉儉素恪守官箴

楊均治蔚州人道光末以諸生官潞城典史在職勤謹民惠之咸豐二年奉檄解餉湖南在道聞岳州陷乃疾馳入武昌

城賊警既逼助之協守城破被執不屈死

賜卹如例世襲雲騎尉

以上潞安府

莊應騏會稽人順治元年介休典史招流亡弭盜賊救水火民咸德之

王之佐浙江人順治二年任臨縣典史姜逆之亂知縣張耀祖殉城之佐領民兵急趨上趙寨誓擒渠魁以圖恢復力不支爲賊所獲義不屈膝罵賊而死賊黨壯之

單可繼高安人平遙典史賢勞王事念切民瘼

孫世蓋興縣人司訓臨縣勤於課士持身接物足爲楷式

秦一鴻會稽人石樓典史賊皆斂迹地方靜謐

喬挺然稷山歲貢康熙中平遙訓導樸貌古心所作有儼占

史咏

馮雲燦金壇人雍正二年以歲貢知汾陽縣有惠政越六年擢本府同知熟悉民事時豪右藉銷鹽無端滋害雲燦思永久便民遂有按糧攤課之議汾陽鹽稅得以循例輸納弊無從起者馮之力也

宋國相偏關貢生雍正五年任石樓訓導持身廉介課士精明捐俸修學古道照人

霍慶姚字漪閣沁水人嘉慶末以進士官汾州教授品優學粹訓士先德行後文藝口講指畫俱平易近人歷任三十餘年成就後學甚眾今士林猶盛稱不置云

楊凝輝聞喜舉人咸豐中永甯州學正嘉惠士林守正不阿有預詞訟者悉擯斥之力協知州梁承光修葺書院甄拔人才年近八旬遠近來學者益眾勤課不厭致仕去任至今猶

思慕之

以上汾州府

鄭天眷石樓人順治中陽城教諭溫恭渾穆舉動皆中禮法而惡衣菲食不苟言笑士咸愛慕去之日傾庠祖餞縵綵不忍舍去

胡拱樞浙江山陰人康熙元年高平縣丞屢署縣事慈惠寬平邑人相率公額崇祀名宦

劉佐世曲沃人高平教諭督課嚴明鼓勵不倦經其指授悉魁傑上材在任修葺廟學規制煥然後登進士以霍邱令卒於家邑弟子思慕不忘私諡文肅先生諸生六十餘人親至曲沃立碑冢上哭奠而歸

趙挺元聞喜歲貢沁水教諭好學能文工書法卓薦累升甘肅布政使

奚士恂錢塘人康熙末沁水縣丞爲政寬平不以苟簡從事
實心行實政民被其澤吏肅然不敢爲蠹裁缺歸

徐昆字厚山臨汾舉人乾隆中陽城教諭立學規八條鐫壁
皆修身經世之學課文根柢六經實心訓迪一時士風丕變
著作頗富其柳厓外編多載邑中軼事

岐鵬翱猗氏副貢沁水教諭品端學優講課外不預他事主
文社六年多所成就

喬于洞猗氏人沁水訓導學博才敏工吟詠精筆札而和易
近人諸生樂從之遊箸有思居集行世

謝彭庚江甯人乾隆中端氏巡檢品端行直慎於戢守事上
接下驕諂不形占籍西曲里曲堤村鄉里至今稱之

以上澤州府

周官順治元年任渾源州吏目直指嘗薦之姜逆之亂死其

官

項一科大同縣丞有能聲姜逆之亂以死勤事

李吐馨同官人靈邱典史姜逆變作其黨集城下者數千人令素恒怯莫知所措吐馨招集鄉勇激以大義慷慨登陣土民胥感泣地當賊衝獨屹然堅守論者偉之

以上大同府

王京順德人順治元年任朔州吏目姜逆之亂死其官

楊達太康人以拔貢判朔州風采凜然歲饑捐俸煮粥全活甚眾雅好崇獎士類請業者經指授胥有法姜逆之亂賊黨姚徇朔州達首倡義諭眾而守備張英寶通賊達覘知密計擒之錮於獄設守禦具翼日登陣道標康姓英黨也按佩刀怒目視達達立起奪其刀英子復鼓譟賊黨乘之入城因爲所執賊欲誘之降達大怒目皆盡裂罵賊不絕口賊怒磔殺

之事聞

贈按察司僉事祀忠烈祠

張肇斌順治五年任大同府西路同知姜逆之亂以死事著
翟熠字青黎聞喜舉人康熙七年大同左雲川衛教授博學
識大體考正禮器樂器詳請樂舞生演禮習樂申明條約嚴
束士子立文武二社課文校藝邊邾之地彬彬有文物之風
遭母憂去後補太原府學捐俸葺名宦鄉賢祠考正其名次
並修文中子祀奉檄分纂山西通志以疾歸卒於家所著有
丁祀考崇祀錄壽憲樓等集行於世

董遂昇河間人以拔貢生知沁水縣遷大同府西路同知性
敏給尤善聽斷不假鈎致具能得情僞在沁水催科有法賦
集而民不病及任同知有重獄業定擬矣察其誣卒開釋之

而寘奸徒於法所轄右衛爲歸化咽喉兔毛河石雲諸堡尤
號險要兵民雜處和輯爲難遂昇撫馭協體遇有徵調尅期
胥集督撫監司皆倚重之後擢漢中府知府以去

朱士毅遼東人以蔭官平陽通判有政聲己未庚申大同游
饑薦擢西路同知盡心振濟邊氓大蘇循惠之稱洋溢朔塞
升雲南知府

王靄翼城進士雍正四年以慈利知縣改官教授補平魯訓
導建文廟修禮器申明條約嚴束士子創修朔平府志知府
延令編纂更革之始文物賴以有徵焉

田夢旗字牧祥汾陽人道光未平魯訓導力新廟學節孝祠
久圯旌典並缺乃協士民實心訪舉建祠並置祭田邊縣多

有仿行者

以上辨
平府

張國賢宛平人順治五年以舉人在太原府中路同知姜逆之亂甯武失陷國賢慷慨臨戎以死事著

贈按察司副使祀忠烈祠

馬維熙忻州州同署太原府西路通判上官胥廉其才姜逆之亂偏關兵變不屈被殺

贈忻州知州祀忠烈祠

劉玉瓚大興進士太原府中路同知兵亂後修廢舉墜安輯有方經征軍租嚴革宿弊吏畏民懷嘗署偏關兵備政績懋著及去軍民頌之不衰

李文煥浙江人康熙間中路同知性彊直勇於任事時奸民有詣京上書願開甯化岢嵐諸山採木輸稅者事下所屬文煥力持之撫部是其議題請停止山民感德立碑以紀其事

卒於官貧不能歸百姓爲起墳甯武城外

以上甯武府

程三錫聞喜舉人康熙中遼州學正廉靜長厚課士勤懇不愧師範

徐正洛錢塘人雍正中遼州吏目端正廉潔有儒吏風

白諾太谷舉人榆社教諭教士有方性愛山水賈峪有奇石

移入學署建拜石亭道光中創修漳河捐重金程其事

以上遼州

陳允忠字孝若遼東人順治中由拔貢擢汾州府同知嘗署沁州廉幹威重徵科有法案無留牘猾胥不得肆其奸陋規耗羨悉捐付學官爲營建資比去幾宇煥然一新

馮鼎樞字北辰高平舉人康熙二十年任沁州學正博物洽聞爲文高古每月朔望集諸生之向學者爲文會飲食教誨款洽甚至且倡修黌宇廣植樹木以遺永利一時司鐸者咸

歎爲弗及云

馮祉字武若宣城人沁州吏目練達明敏勤於其職康熙丙子霜災饑民強糶至聚黨行劫時州守方公出社計擒其魁四人守歸杖斃之復力贊賑恤躬任其事全活甚眾凡在任三十三年歷事七守時時通達民隱使上下無扞格齟齬人稱其能升福建按察司檢校州人立石頌之

沁州以上

呂子瑗字佩安武進副貢嘉慶元年以平定州判分駐樂平時裁縣後差務科派多沿舊規鄉民涉訟經年子瑗開誠布公委曲詳懇均歸裁免鄉人德之尸祝焉

傅永錫字純嘏新河副貢道光八年平定州判甲午乙未連遭饑饉倡捐錢米設廠煮粥全活甚多

以上平定州

周遠祚臨汾人順治間以舉人任繁峙縣教諭姜逆之亂城

上卷之三十三 名臣金十三
三四
陷勒受僞職死之

章時雨宛平人由拔貢任五臺教諭好謀善斷不類腐儒姜瓖之變與邑令吳琮同心協力共守危城者一年後擢都昌知縣

宋師聖泰安人康熙十一年以拔貢任崞縣丞勤敏爲政嘗督修城垣及廟學捐俸助工制度燦備治民尤篤慈惠有真民父母之頌立石志去思祀名宦

王瀚猗氏人雍正三年以副貢任五臺教諭學問淵博循循善誘己酉壬子間科目稱盛皆瀚所作育云

王兆鵬字儀九汾陽舉人乾隆十八年以明通任五臺教諭性剛正嚴毅精制義擇高才生自課之諸生有行止不端者戒飭不貸或因訟累屈辱亦爲申雪時知縣賴宏典性貪暴

好凌折士子兆鵬屢忿爭宏典銜之文廟大成殿梁折將傾兆鵬倡捐重修工成已折之梁無所用諸生公議解板爲兆鵬壽棺宏典聞之卽以私易文廟梁木通詳提省訊鞠問官袒宏典坐兆鵬罪革職充四川極邊軍五臺門人徐敬儒等鳩資贖罪乃放歸里居教授年八十餘卒

康基田字茂園興縣人以明通任繁峙教諭勸學愛士修文廟浚泮池雙泉湧出次年丁丑成進士後官至東河總督其繁峙學署有懷詩人多誦之

以上代州

劉瀚字滄若曲沃舉人康熙中保德州學正修葺孔廟留心作人升陽高衛教授明倫堂有去思碑

李甲黃黎城人順治中安邑教諭課士有方修理學宮升安平縣知縣官至工部都水司主事

王澤永甯州選貢康熙中芮城教諭才識敏練學問宏通與之遊者如坐春風薦舉卓異升四川榮縣令

陳奕禧海鹽人安邑縣丞勤職守工詩文書法行世累官南安守

王執信平定州舉人乾隆中芮城教諭品優學邃多士景從增修學宮續纂邑志其功尤多

白光珮渾源州歲貢芮城訓導道義律身真誠課士以老歸諸生攀送有輿誦詩勒石存明倫堂壁間

以上解州

周茂覺浙江人順治間任垣曲縣典史嘗積俸修廳署不傳舍視之姜逆之亂死於城守

黃籍靜樂人垣曲訓導姜瓖叛遠近應者四起城破籍罵賊死

崔珩壺關舉人絳縣教諭順治六年五月土賊破城邑令逃去珩不屈投井以殉祀名宦

徐祚煥奉天人由絳州州同兩攝絳縣事時土寇焚燬縣城學宮僅存正殿傾圮不堪祚煥修復之

任懷鵠會稽人聞喜縣丞清慎多惠政

胡天爵浙江山陰人垣曲典史有幹才招叛有功遷汀州巡檢

孫世蓋字丹臺興縣人順治十二年由臨縣訓導升垣曲教諭垣自罹兵燹絃誦幾輟世蓋躬率迪之士風丕變時提學下令不報劣者黜其官世蓋歷兩歲試不一報曰枉人以庇已吾不爲也考最升崇仁知縣閔庠肖像於石以誌弗謖先是學宮鞠爲茂草世蓋捐俸葺之瀕行猶留金助費以不克

觀成爲憾云祀循良祠

已見汾州府

張世清會稽舉人路安府籍康熙中絳州學正氣度寬和才思通敏詩效元白體與多士相唱和在州歷二十年升平陽教授卒

程好生祁縣舉人爲絳州學正博學能文士楷式之繼任爲董梅平定州舉人工詩文從遊甚眾

賈若瑚陽曲歲貢任聞喜訓導育才有法捐俸葺文廟廣植樹木今槐柏成列森蔭官牆皆其手栽也

姬暉字吉甫平定人乾隆十年以舉人任河津教諭性和平饒丰度端凝暉厚與之接如坐光風霽月中立教以敦倫飭行爲先中藏懇切諸生積學而貧者優禮之倍加體恤九年以老乞歸津士懷之

喬集鵬字儀廷猗氏人以進士官教授補河津教諭端重謹
威儀來任時年方踰弱冠才雋學純行方志潔文清書院初
成廷主講席談經校藝寒暑風雨無少輟諸生咸奮於學登
科第者接踵在任十五年遷修武知縣調泌陽循聲著中州
云

沈銘順天人任絳縣典史居官勤慎凡事有裨於民者多贊
成之子豐復亦以縣尉涖絳尤得民心嘉慶辛酉歲饑多方
調劑邑無流亡士民以喬梓繼美頌之

韓澂汾陽人道光十七年以舉人任垣曲教諭素習武事重
名義咸豐三年髮賊破城澂手椎擊賊殺十餘人力竭遇害
其妻曰夫既死何生爲與子媳俱投水死事聞

優旨褒獎製雲騎尉祀忠烈祠當澂死時所蓄犬常守尸側

晝夜不離旣斂猶時哀鳴柩前竟不食死皆稱爲義犬云
高一元定襄歲貢任垣曲訓導癸丑之變年踰七旬矣自縊
死贈恤如例祀忠烈祠

王覃通州人垣曲典史同治六年捻匪陷城聞縣令王赴火
死亦自殺以殉抵任甫八日也贈恤如例祀忠烈祠

以上絳州

徐士鶚浙江人順治六年任大甯典史姜逆之亂守城不少
規避城破死之妻子亦偕死焉

鍾夢豹宛平人永和典史姜逆之亂誓以身殉不屈死祀忠

烈祠

瞿全仁字純庵平定舉人雍正十一年任陽州學正鼓勵士
風修明學政革除丁祭陋習敬復古制

張紹杰字亞三應州舉人道光十六年任大甯訓導廉靜寡

欲學有根柢督修學官倡立齋房勸課士子不憚勤勞以上
胡仁餘姚人順治元年任趙城典史才優而有守重開通利

渠督修護城河隄其功甚偉發奸摘伏卓有能聲

朱應元山陰人霍州吏目緝捕勤能盜賊屏跡

周士錦建安人康熙八年由選拔任霍州判官勤謹佐治墮
泊無擾累署州篆著有賢聲

李用文錢塘人趙城典史好學工詩並曉音律居官不名一
錢盡心緝捕四境肅清時 大兵西征佐供億事糗糧夫馬
親爲給役地方帖然暇則跨一騎攜奚童負囊尋勝有昌谷
風時論美之

張仕敬益都人乾隆中靈石典史二十三年六月大雨山水
暴至決城北門入居人相率陟屋登城以避而南門關閉水

山西通志卷一百十三
名臣金十三
不得洩勢危甚仕敬識水性泅至門下去樓門闢水退人民獲全

劉衡詔文水人靈石教諭勤課士子行止嚴正嘉慶二年捐俸修學宮闕邑頌之

以土
霍州

右一百三十六人

山西通志卷一百十三

一